

MANIFIESTO DE PROFESORS D'UNIBERSIDAZ, RECHIRADORS E ZIENTIFICOS DE TOT RO MUNDO Á FAVOR DE O RECONOXIMIENTO E DINIFICAZIÓN DE AS LENGUAS MINORITARIAS D'ARAGÓN

*Ye como un paxaro que pierde as plumas.
En beyes pasar una d'ellas abentata por l'airera, e au:
atra parola que se'n ye ita.*

Johnny Hill, Jr., de Parker, Arizona,
uno de os zaguers fablans de "chemehuevi".

Cada dos semanas s'amorta una lengua. Ye posible que á finals de o sieglo aigan desaparexito cuasi a metá de as zerca de 7.000 lenguas que se charran güé en o mundo, a mida que as comunidaz abaldonan as suyas lenguas endochenas en fabor de as mayoritarias.

En l'Atlas de as lenguas de o mundo en periglo, feito por a Unesco (2010), se i cuaterna l'aragonés como una de as que se troban en ista situazió, posiblement una de as lenguas de a Unión Europea que se presenta con pior futuro ta ra suya conserbazió. Por atra parti o catalán charrato en Aragón endura un esclatero recule e castellanizazió por no disponer de as ferramientas á propio ta ra suya normalizazió.

Alto u baxo unas 100.000 personas (un 7% de a poblazió total d'Aragón) parolían una d'istas lenguas minoritarias, un patrimonio inmaterial de tota ra umanidá de a cuala coserbazió toz, e más que más os gubernos, somos responsables.

En 2009 as Cortes d'Aragón apreban una lei d'uso, protezió e promozión que reconoxeba a esistenzia tanto de l'aragonés como de o catalán e guaranziaba l'aprendizache (bogal) en l'amostranza establita e determinatos dreitos de os fablans, entre istos, u d'endrezar-se e ser contestato por l'Almenistración (en determinatos causos) en as suyas resputibas lenguas. Ista lei mai ye plegata á aplicar-se.

L'autual Gubierno d'Aragón, inorando a normatiba internacional (Declaración Unibersal de os Dreitos Umans, Pauto Internacional de os Dreitos Zebils e Puliticos, Carta Europea de as Lenguas Rexionals e Minoritarias...), estatal (Constituzión Española de 1978) e o propio Estatuto d'Autonomía, pretende, derogando a lei de 2009, aprebar una norma que refusa a esistenzia tanto de l'aragonés como de o catalán e condena a istas dos lenguas (as dos con un zereño erenzio literario e con un intresán presén creyatibo) á ra imbisibilidá e, a meyo plazo, a ro suyo acotolamiento.

Ye por ixo que os siñadors d'iste manifiesto, miembros de a comunidá zientifica, muestran o suyo refirme á o reconoximiento esclatero de l'aragonés e de o catalán charratos en Aragón, asinas como de os dreitos de os suyos fablans, ta un desarrollo publico normal de as dos lenguas, en aplicazió de a legalidá internacional en ista materia y en igualdá de condizions con a resta de as lenguas d'España, d'Europa e o mundo.

[Refirmo iste manifiesto](#)